

四庫全書

集部

欽定四庫全書

景文集卷五十二

宋 宋祁 撰

啓

賀文相公啓

伏審光奉制麻榮持武節伏惟慶慰恭以閣下識諳民
極氣函天倪奮謀自將與聖胥會煩使已試素論僉宜
遂階三事之聯進穆萬樞之總巨壘朝閉丙車夕馳一

欽定四庫全書

旗麾衆以暫登寸縻嬰賊而還獻迎頒茂冊即正冢司
贊宗祀之上儀揭並侑之新典百度底定九德敷施爰
賴獨賢再休近輔朝謀元帥帝念宗工祇築齋壇顯受
師鉞臨遣前席大撫西人漢家之注意安危並師舊德
吉甫之兼資文武庸式萬邦詎淹零雨之還竚復泰階
之冠初方勤障候阻飭巾幘瞻朔門墉飛馳鈐府

賀相公啓

伏審光奉制函改疏藩社伏惟慶慰恭以閣下沉謀隱

正惇德粹明感會先朝協恭順采萬樞俾入露金石之
至誠三雷危言摧豺狼之餓喙背憎迭逞身退罔私會
正宁之執彊判羣邪而圖舊子文三已曾喜愠之不形
姬旦未歸固室家之同望洊更巨屏均暢遠猷茲者北
海表封東秦均重再煩坐鎮之德克宣決大之風然而
人鬱具瞻邦思弼直天將為鐸竢適舌之至音政若和
羹竚蓀梅之妙味詎屆暮年之報即迎三節之趨大庇
含生永孚久業

賀集賢李相公啓

伏審肅奉制恩對司魁柄伏惟慶慰恭以集賢相公慮
經萬事業映九功曩自先朝已膺茂宰去邦不校則靜
若淵渟會聖有期則毅然山立運有夷險道無溜磷屬
明辟之數求眷舊人而圖任越由藩枳再序公槐伏以
東山見思歎還歸之甚晚南宮所著留故事以居多方
抃登賢遽收崇讓矧佐王之為重匪收汗之可期願體
清衷速膺殊典載披題誨但伏眷私

賀史館相公啟

一作賀富相公啟

伏觀今月十六日麻制伏審昭備冊恩入正台府伏惟
慶慰恭以閣下業總民極氣陶天倪自大對清規安步
華掖詞折醜類德庇生人復故約于撫和屈佳兵于不
戰進幹樞綽出均賢勞謀當帝心功暴方夏遂膺帝賚
之素入光公孫之求對執萬機顯正三事槐朝表位慶
聖賢之同時鼎足承君併安危之注意至公在位有識
均歡初早誤知憐欽聞命數乘北障之守詎敢彈冠溯

西閣之深情難飛羽第均紳笏參仰坯陶

賀井州安撫相公啓

伏審寵被墨麻移鎮藩牧伏惟慶慰恭以經畧安撫相
公神贊忠傑天基謀謨坐清叛戎大造西鄙進茂帝緯
昭穆彝倫遂均三事之勞蒙總中軍之令堯曰四嶽實
統諸侯周制上公亦居二伯中外雖異倚注弗殊但虞
桑蔭之淹復冠槐階之貴士類攸仰天下同瞻初尚守
邊符莫陪賓贊心傾德宇恨不翰飛

賀文相公啟

伏覩去月十一日內降白麻伏審顯奉制恩式序元宰
伏惟慶慰恭以閣下忠實天挺器本國資蓄為嘉猷邁
作昭德自禽繫妖盜綏靜黎元講希世之洪儀浹函區
之大需協風入律人有太和赫日當天物無斜影旋委
魁柄外倡方侯其如簡在之眷素隆是以還相之期難
久誕告剛旦復冠乾台冊賜焜煌書贊優重弼惟帝賚
宜體貌之愈加公自西來固室家之相賀永光丕緯遂

格上穹初加以鯁屢誤蒙獎錄遠滯屯鄙側聽褒音慶
坵治之在辰阻巾幘而詣府欣忭之切精縉奚宣

賀南京劉相公啟

伏審懇辭宰柄出守留都確請不回俞音俄降伏惟慶
慰恭以大觀文相公照通三極業茂九歌感會帝期彌
綸王體隱含章而內健藹造辟以進思七年于今百度
咸入功名之地不處亟露奏封進退之正有宜遂申高
節增冬官之茂秩帖雲殿之秘資用付南畿益行多戶

宗臣舊法固自著于廟堂仁人乃心豈不離于王室鎮
息浮動均一賢勞和適剴州符阻通慶謁欽懷風矩參
激衿膺

賀柴相公啟

伏審肅膺明制改燾近藩伏惟慶慰恭以閣下茂德參
和大猷經遠世嗣廟彛之伐入連王館之榮節制中權
耳耳華于六轡網繆上袞煌煌視于三階執競又新疇
勞彌渥眷言旬服移建侯邦推異數于爰田實衍封于

家稍僉言既允誕告咸聞何確懇以辭隆尚留恩而引
日特貽鈞翰過列謙情竚即寵光方紆勤企

賀廣信軍武六宅啓

伏審寵正使名茂光戎轄守符未改邊鎖增雄足下英
概自高沈謀克際敵上所愾驚勇于餘積閱有歲月之
淹薦賢交章奏之密果從聖簡進服恩褒列帥慰以相
歡中軍倚而增重攝符無狀即席是資竊抃餘音回符
久禱

賀李宣徽生日啟

伏以天賚良弼國仰宗臣茂協高秋共欣慶日恭以臺
下資稟忠厚謀濟沈雄宣力百為同寅一德生毓在旦
峻極有基重望元功久當一面之委長年雅壽宜歸千
歲之延卓冠朝塗永光王府祁官難離次地即富隣躬
詣莫諧禱祈增萬

謝生日餽物啟

叨塵從籍倫比儒紳私記所生內惟永感而台造垂記

慶問下馳牢牽在庭薰劑凝器副之仙繪申以齋醪惟
山木之不才況樵膠之且老仰蒙善祝俾永年願依
埏鑄之餘更奮庭殘之氣丹膺內刻訥語難宣

上王尚書啟

初八月未到都臥家養疾得不事事故羸瘠欣欣有生
意但神疲氣耗未任趨走日不遑舍上恩如天可勝道
哉不審比來明公百況何似知深究導養術塵緣日輕
此僕晚聞道之罪不得望公藩牆矣然冀遂進之母怠

于九德三事亦何所妨嫌云

上資政尚書啟

初惶恐奏記資政尚書執事葉拱之隔歲實載華乃情
屬溯與日參極郊圻胥接風謠亟聞恭承鎮撫餘閒福
祚崇衍羌零微警調度少勤離京控制事務彌劇伏望
慎固冲守綏協善經徐副民瞻還步台輔氈屨舊物他
人無真縷縷懇懇知所歸庇不任禱戀之至不宣

回青州夏尚書啟

屬者國家以表海仍饑生蠅為瘵鬱其嘉氣瘳此下民
上深軫于何辜我實難于共此得于舊輔殿是大邦恭
惟尚書道茂協恭眷深同體細文即授便道按行包季
薊之全區將仲山之明命詔書一切許于便宜漕舳相
銜資于仰給永惟賦政備覲有猷閭租計之會期濟流
庸之沒振汙萊故壤遄及于屢豐愁嘆餘音坐成于式
舞不啟後艱之隙允繫坐鎮之方績簡帝心功暴民聽
朝無異論賞有舊章遽沐書文備形謙意九重歸美民

欽長者之言四近疇庸寧後富民之拜感慙所萃數繹
匪殫

回晏尚書到任啟

伏自尚書暫辭機軸近撫藩垣揭天節以載華總齋航
而右汭便時叶吉樹政有經恭惟天一與區鬱華勝里
文壇藉屬經順拜于宸游封屋連雲有望霓之故老式
倚神明之化往敦愷悌之風何辱謙儀特貽音咫尺篤嘗
僚之曩誼露存闕之深情沉切營求諒非遠復冀綿綿

而存用副赫赫之攸瞻披晤尚遙編摩非述

賀三司韓尚書啟

伏審光奉制恩入司邦計伏惟慶慰恭以尚書稟天正
氣肖道太和親逢帝期進輔皇載畜自一德奮為九功
向引避于機衡又回倡于方岳經費之重畧入實繁屈
安石東山之高領張蒼北平之總納節王府換秩天臺
聊豐寶路之財行復符階之貴參質于衆誰不具然初
夙荷誤知側聞勝告欣頌并集慶候難階

回諸官為轉尚書承旨啟

向者以偕衆成書擢升左轄滿年循例進齒中臺緣內
署之乏員枉複門之召節多病在告懇讓未俞靜言衰
晏之餘曷稱凝嚴之拜此蓋閣下素加優品仍既雅游
因成命之已行借褒言而為地敢忘悉力仰答重知

回夏尚書南京上任啟

伏承榮燾顯都肅開上府道風所被禮俗載康恭惟尚
書識照聖鄰謀舍國采早同寅于成務游凝績以蕃君

金史卷之二十一
卷五十二
北漢鄧侯謹信而司籥為周中伯惠直以揉邦屬信處
之云初顧化成而允賴猥紆公翰申賁禮華永惟萬戶
之嚴聊浹九河之潤冀道天祉翹奉帝咨佩哉欣愉一
二非述

回宋尚書啟

比者伏以尚書輟務樞庭回光台極聖期胥選賢業載
熙罄牢讓以亟聞留茂恩而羌久寵紆優答姑廢雅懷
入對丹塗之嚴進踐槐階之亞周言交錫有佇于告猷

天下居安更隆于注意方欣附末遽辱詔音銜謙德以
斯勞幸宗盟之永庇茲焉感躍實倍倫夷

又回宋尚書啟

伏審光膺詔綽參總政機伏惟慶慰恭以尚書學際三
儀謀經九德若時佐聖履格奮庸自命節以歸趨翊帝
樞之宥密終緣民望還貳台司超進七兵之曹增重三
槐之路俞咨素定朝野相歡承尚讓以自陳頗留恩而
引避并垂緒誨式履終謙况敦詔以尋頒幸雅懷之無

固傾軫對寵併釋翹誠

上青州夏尚書啟

伏自尚書上還樞筦近抗藩麾順泝長波鎮臨善部方
欲託飛郵而奏記私執事以布懷旋審朱轡改疏青社
以時便道靡遑客寢之安所至宣風用示簡書之急頓
遙師坐終曠單函恭惟視事云初嚮福咸又歌齊之壤
表海成邦比歲洊饑斯人失職蚩蚩土著寢苦庸亡渢
渢頌聲鞠為愁嘆睿明垂軫中是載懷咨蕭育之名臣

振爽鳩之故俗報同五月之速落去細苛事從一切之
宜仰成咻噢荒餘攸庇仁壽可期我實徂東諒結姬公
之愛上方倚相行膺壺遂之求願保天均俯對民譽眷
孤生于銜遇列勤惓以兼常

上陳州晏尚書啟

伏審祇奉朝俞取升台坐伏惟慶慰恭惟知府尚書文
經天極照洞民彝八對光華之辰亟揚久大之業微言
茂藻賁堯思之安安嘉話遠猷贊臯謨之采采退安吉

履迭守近封冥物眈之虧成放道樞之曼衍冲機潛應
休問自升建景風之賞期進白雲之官紀露陳賜冕聊
夸六枳之藩馳執覲圭行正三槐之位民瞻久竦帝賚
有聞初欽聽除音叢歡勞府屬攸箴之有守邈申慶以
難階傾抃所深名言非狀

上許州張相公陳州晏尚書啟

近聽恩制序進卿聯列讓靡還冒榮增悞伏念某本綠
天幸忝參國均會聰睿之日躋乏謀猷而譽處有軒竊

祿不槁餘困未登攷歲之期遽濫賞風之典外譁鄉議
仰累朝猷敢謂閣下錫以公言與其禮進絢書郵之慶
問分台舍之餘輝願佩優評庶亡祗悔丹愚萃感搢翰
匪宣

回賀加尚書啟

嚮以成書冒榮左轄茲繇滿歲進秩中臺寵過者災必
相尋食浮者人將不稱惕然自愧罔或遑寧敢圖評旦
之優助協朝僉之允華褒已定危惻差安遂繫金石之

交更決桑榆之勝瞻言厚德載戢丹衷

東兗州侍講尚書啟

伏審光奉制恩進升寵級伏惟慶慰恭以尚書業宣寅
亮體叶允元服榮牒于三朝逮華顛而一節上方向學
延雋老以詳求緒欲鎮浮據中庸而易退出麾東社紆
眷南闡茲者國家抑畏先猷振除後咎辰居勿亟渙號
惟新眷舊德以同寅舉徽章而異等心存王室重申伯
之于藩禮蔚帝師邁甘盤之罔顯絲綰遂布紳櫓相趨

初風被慈憐均矚渥縹瀾龍門而且右躍螽股以忘疲
卑情無任欣抃之至

謝留府尚書啓

待罪禁垣睽風幕府六符在望三歲其陰距容舫之流
坐驚宋遠遡飛鴻之渚久竚公歸結深戀于華軒耿離
悵于疏旆敢謂留府尚書乘偃蓄之暇紆紙筆之精數
屬善辭勤經至意餘光所照頓忘家部之咨舊物載懷
竊附吾甌之托題襟佩教撫已知歸九旻之宇寢高千

門之鑰惟謹願安頤嗇仰重眷毗俟四輔之營求庇一
陶之埏鑄乃情為徯緩頰匪宣

代鄭公回夏尚書啟

茲者祇荷朝綸賜停機柄進肅天台之務仍參規廷之
華曠職五期蒙恩一解榮非所望愧不容顏敢謂尚書
敦操有筠推情悅栢絢書辭而垂慶助師錫以申褒冀
訂良箴益紆多悔接緒風而猶邈敷感抱以奚殫

上判府尚書啟

伏審表海報成坐躋樂國中圻分理進守留京幕府既
開彼都何幸恭惟尚書明謨熙綽浚德惇元洊幹機樞
彌忠力而自效均國勞任與師濟以和衷靈龜在中喻
馬忘累雖復勉班春而振乏大庇物于屢豐出乃緒餘
同人憂樂賞圖尤異聊襲冕以露華地直鬱蔥果錫圭
而委重惟泰宇之先定非外物之屢遷今茲偃蕃是均
倚相宣尼之懷吾黨尚念斐成周人之詠我公固應信
處願孚百順俯協四時浹河福以并蒙迓鑾聲之歸止

祈早塵評眷今宿官司撫舊集歡倍百彛等

賀樞密侍郎生日啓

伏以積善所憑愛啟莫京之胄元精發粹用生名世之
賢紀六矢之初辰續百金之雅壽恭惟侍郎選言復貫
淳德浚明包民極以佐王又天樞而圖國載生流慶方
賴于壯猷延祝侑歡輒修于薄贄庶宣勤悃具列別封
上蔡副樞生日啓

高嶽極天本慶基而憑厚右賢名世屬聖旦以挺生歷

載誕之嘉特仰有猷之僞輔並均善禱式美如仁恭惟
閣下惠迪人彝參和國緯翊聲明于義如濟文軫于蒙
中約矢射方遂符于夙志累茵稱壽更慶于慈顏願滋
苞竹之榮寢啓和梅之業輒茲菲贄聊侑歡悰已具別
幅啟聞

上李都尉王都尉啟

伏審肅奉明恩改書近社伏惟慶慰都尉機靈敏裕履
尚詳華贄九類而有猷服千齡而逢聖聯姻沁館焜照

于天潢接寵韓壇總提于師節乃神在宥進律推榮清
明之朝聿伸于誕告蕃宣之寵游易于邇封允協羣言
猶煩確讓願時膺夫茂典用增煥于中權過沐公函但
銜謙德

賀安撫龍圖啓

伏審進膺禁城出撫介藩綏安列邦總護諸將吉音騰
驛公議同咨恭惟安撫國器閎通辰猷幅臆雖全盛德
自結上知向屬河朔無年縣官勤餉遴擇髦譽經制賦

財振匱為豐化愁而忤萬倉之粟知斂八府之錢不流
擢參從車用待明制丕績益奮華寵亟臻果因墀地之
趨入直河圖之秘遂傳一面分控北邊雲屯百城已豫
歡于美教綬胡萬旅方傾聽于先庾第資卻穀之中軍
階嗣平當之茂宰初早聯朋襜今託隣光仰波之餘執
柯不遠載惟欣偃何喻端倪

賀宋安撫啟

上閣祕嚴北邊控撫並華使領允協朝僉安撫才勇挺

資機鈐濟美擢財少府尚籠羣貨之貿遷持節朔陞盡
得藩渠之要領入數課目啓沃宸聰果延郁穆之褒遂
副綏安之重沉緣雅契尤慰私悰方安步于亨衢枉移
文于書舍謙勤可復欣感相并

賀宮師杜相公啟

伏審茂膺明制進冠崇聯伏惟慶慰恭以閣下天挺方
嚴道畀冲厚早服休運晚躋柄司種厥德以惇明蕩他
賜之渙惡功在鐘鼎言留典謨所以奮堂上之奇忠宜

盡瘁然後謝人間之務誼不苟貪有識凝咨當陽欽美
雖几杖自便而典冊再光悉俸于官即家為府帥臣之
位一品弗辜愈榮君子之壽萬年在間彌佚賢哲相望
今古幾何祁夙預洪鈞側聆異數顧邊符之有守湖材
厦以方違溢喜所并臨文奚喻

上省副張中庸啟

被教以老夫久疾特賜存慰何感如之僕苦寒瘧幾三
旬不能止今惟耆皮裹衰骨以疲神耗氣守之但未及

死耳比來似小勝然未得平彊手足酸重令諸兒相扶
持方得履地恐因此遂不能為完人天以此俾僕早還
邱園耳凡藥補之過暖則躁而遽近溫則紆而不切單
劑毒品又不敢徼幸此最難為調適是以淹臥至此應
數奇致然來問丁寧故一二具道乍省局事約吏詳甚
善順時愛攝

賀大名王相公啓

伏審茂膺恩冊進拜齋壇伏惟慶慰恭以閣下上袞宗

工華顛舊德歷相二后交穆萬樞輻假安安簡上心而有素羣言諤諤滿天下而罔私久偃藩維頗均賢逸而北門須屏中宸慎疇猗紆茂宰之僉回顧元戎之制疏榮曹社坐鎮魏臺抗大旆之悠悠肅使駢之耳耳晉卿作帥並推卻穀之賢漢相臨屯益竦呼韓之畏永言作翰式竚銘勲初早庇洪鈞欽聆渥典阻翹材之伸慶望驅憶以馳魂歡緒愧悰參并無喻

上龐相公啓

欽定四庫全書

卷五十二

伏審亟露需章上還宰柄義當均逸恩許偃藩羣望悵
然有道欽止恭惟閣下才為世挺運與聖偕嚮敎西戎
入陪右府翊戴丕后勤勞王家遂回樞省之嚴聿冠乾
台之貴南洗蠻霧近盪隴氛太羹和而既平九鼎隱焉
增重茂勲方顯勇退自高或罪或知固顯仲尼之道大
何喜何愠益知今尹之德全聊倡方侯行歸冢席祁早
依埏治今屬扞城侍材閣以永辰吮禿毫而無緒企戀
之極一二奚宣

景文集卷五十二

欽定四庫全書

景文集卷五十三

宋 宋祁 撰

啟

上許州太師相公啟

伏以黃圖近輔陪壤天居層極貴台冠儀侯服沛河靈
而并潤歸鼎重以叅和百順具臻庶工胥慰恭惟太師
相公業宣駿假慮入幾神副師尹于民瞻本孝侯之天

賜凝華協帝實相清明之初敷哲保身不處功名之地
亟均賢事暫殿翰蕃冥物畛以外齊據道環而中應然
而商家舊學素有待于甘盤漢幄宗臣難從遊於松子
諒須旦暮再秉機衡眷跼屢之緒餘倚歲霖以休澤縷
縷所祝呐呐匪宣

上西京留府太師相公啟

伏審改特命節移總留都伏惟歡慶恭以閤下道冠民
彛業熙帝緯武以摧元惡之漸文以佐大化之成暫均

夙勞益儲鉅望上心攸眷褒冊俄頒輟西洛之保釐委
北門之鎮撫介圭卓馬方脩覲於帝闈九鼎長城已懽
威於敵國不待期月諒促召裝且還冠於霄階用永安
于廟社衰殘無狀埏播焉依

賀大名太師王相公咎

伏審茂膺制命兼踐宰司伏惟慶慰恭以太師相公威
會二儀懋崇九德躬負日月以啟於大明神合著龜用
經於庶務均勞朝夕之誨出藩海岱之區卓爾讓夷退

然蹈道改疏北社握節元戎鬱巖石之具瞻愜若鴻之
無所果頒帝告即序乾台當一面以于蕃許二公而居
外式是列辟模我彝倫疇大庇於如神復坐論於此道
顧茲命數式應官占祁風被挺陶欽聞渥縟宿官司畏
謁府無從

上太師相公啟

伏審太師相公進升台席伏惟慶慰恭以太師相公道
包庶貳識貫幾初魚烝汕以丁辰鳳覽輝而奮業尹躬

一德早契於先猷舜政重華載言于萬事茂迪無窮之
烈亟遵易退之方假節東齊詠均靈雨建牙全魏隱若
長城聳民望而未移果天私之改需惟師視扶適冠于
友邦論道一榮更聯于公枳協官占而誕告藹師錫以
衾同而況天意佑民帝心圖舊漢官百度素稟蕭規周
室二南聊分邵右竚噦鑒之肆覲增歌鼎之圖安祁早
服慈憐欽聞渙命旅賓替而尚邀抃心極以惟勤

回外任賀諫議啟

嚮以備位經筵沾恩宸綽猥由末至例合叙升促大比之常規玷通言之清列寵方躡等得無糠粃之羞祿已浮人更重鵠鉅之誚方慙冒竊遽枉絨縻味褒飾之過情第特循之式倣永惟銜戢罔旣名言

回并代陪署孟都使啟

伏審序升近職移佐中軍成命有光羣言胥允恭惟執事沈謀先事美闕映時外提雲壘之雄內董星藩之祕果疇見效益峻榮階輟全魏之訓師奄太原而經武殊

鄰欽衽均萬里之干城諸校趨風重九天之下將適欽
襄進遽狂緘滕載欽悅禮之賢第積裝懷之感晤陪云
遠企詠奚殫

上鎮府部署王都使啟

承已視事伏用欣慶都使以世烈之顯復才為上知環
衛親近出貳師府方建高牙以付一面惟保納冲和以
究遠猷鄰路翹企不宣

回王部署都使啟

伏審光奉命書進膺劇職值才而受有識胥歡恭惟執
事器尚沈雄忠猷懋臆周通軍志善得士心自提親旅
之嚴兼護邊陲之重威懾獫狁功著王旂遂因蘭錡之
虛階亟亞星藩之邇衛中營倚重式光輦鼓之求敵國
聞風更聳金湯之畏方欣華渚俄枉謙言罄敷冲讓之
懷周締親鄰之好仰欽德範足採邦彛慶愧所并矜紳
交篆

回孫閣使謝官啟

比者執事以屏翰之勞厚顯印之眷惠孚善俗威懾殊
鄰隱然萬里之防當茲一而之寄采謠來上咸命聿頌
升華閣之使儀下掖垣之咨命屬茲遽直猥獲代言宣
允顯之猷罔周茂伐迫稽留之禁殊乏善詞舐鉛筆以
僅成付綿囊而慎出敢圖譙槩遽枉書滕布款密於言
樞屈雄嚴於義府仍將珍幣以絢書儀公於所言況奉
惟幾之戒私其受貺寧逃厭取之羞輒廢讓懼欽承厚
意鏤丹愚而積感非啞口以殫論

謝及第啟

雪袂傳趨竝集規庭之秘芝函誕告茂傾綸采之榮獲
預言揚舉增夕惕竊以周家共賢者之樂式訂思皇之
篇唐室獲敷中之雄大署前鄉之號皆以寤求側陋尊
籲峻良拔十之取至精羣百之廉親爽粉澤賢業于以
暢同文之規笙簧帝謨于以贊丕天之律卓為能事屬
我泰辰國家援史契以右文憲奎鉤而按牒厯選與訓
庸見大猷煥于堯章蔚垂光于四表炳然漢德森奉御

于千篇肅羽嬉翔珍羣筵集邁宅丕之承烈咨故訓以
垂精象大璧之雖流典容寢講厲砥石而磨鈍爵馭載
縻細文下乎方州吉士旅于庭物崇簡臣隣之重慎司
秀選之求睿式震巖廟謨教盡文每奏而稱善仲覆用
加士三適而有功新書彌謹夙材萃止官棧翹然諒匪
學踐聖優職窮言貫膝倚桑林之舞神欲沛游未至睢
陽之園妍辭槩警則何以仰膺勸駕祇奉式言預棘籬
之第名備囊闡之乙覽亶咨國彥始協人言如祁者數

本隻奇才無肖似謬叅靈最猥席慶餘失南畝之轉緣
濫中陵之樂育仲佑之畢罕遽於師嚴成屈之杯自驚
其性失徒以早紬晏楹之訓久諱東家之窮英游誚其
節疏連塞甘乎頭責量愁多萬斛之苦積疹豈一丸之
銷奔走煨塵支離皮骨問僞鄉梓求餞歌萃州司
敦遣以臨門縣次偕來而續食利見中天之闕獨校尚
書之闡儼佩紛而並趨幾閣筆而不下根柢之容素乏
敢冀目成神明之觀坐迷頗虞氣耗勉從叩寂內怵他

先所宜謹顏氏之舍藏先子雲之觸罷並逃九戾無預
于盈虛並騁百鈞前憂乎挽竭寧期黔淺誤及甄收採
嘖韻于折揚露牘姿于仁壽越陪下綴祇造清廂錦凡
橫霞親呈其署議楓宸燭日諦望于顒卬仰清問之載
俞遽哲科而中選若若之綬蕃錫以光軀灑灑之言舉
行而申倣走牆奚讓渙汗莫收籩粝在前顧公非而可
畏履穉愈下荷至鑒之不遺矧夫塤伯之榮冠乃王髦
之列聯跼並秀懷組相趨佩華寵之沓臻撫僂躬而內

省愧流浹背情感裝懷斯益伏過閣下協比國猷若時
天緯賡縵雲而啟旦賁倬漢以垂章並刈衆材居無棄
物續鳧斷鵠必盡生之短長誠衡垂鈞不為人而輕重
目眚拯其將墜采菲俾於蕪資枯木無容罔吝犧樽之
飾承苓為主備收樂蘇之珍荷更品以于茲撫孤生而
奚報謹當稽叅官式勤緝政綱疏濬乃心服朝家之成
憲僣倪從事講肉食之遠謀仰酬如卵之私俯厲析肝
之誓過茲已往未知所圖

賀三司內翰直學士啟

伏審光奉制恩進司邦計伏惟慶慰恭以三司內翰學士負顏閔之摯邁陶姚之隆內發懿文昭賁皇極更踐詞禁回清憲臺基命省中之嚴閱滿天下之事迭總藩要歸上治成卓哉帝簡于衷浩然物飽其論故抑柄用以熟民瞻聊司咳人之繁式興長利之美叶文學大夫之義足司農少府之淵績用有光政將焉往願少安于寵次方徐炳于台符早接盍簪今乘絕塞欽詔緡之引

拜撫宮綬以知榮展慶莫從循衿增抃

回延州通判太博啟

伏承足下以府奏論才臺恩賜第寵光朝路聲震文林
每為卓越之才早屈藩宣之佐雄邊轉粟屢濟師期削
牘論兵頻經帝覽讓夷弗處宣力載虔果旌出類之能
不待程文之召擢升俊目對易容司諒嘉會之有開縱
翰飛而巨測敢謂謙損遠記衰殘因逢聖以極言及提
衡之餘論申研麗采已慙揚糝之先欽祝華階早服持

荷之從茲為欣嘆拙布名言

代回刁太博啟

比者賜罷宰聯寵分州寄式揚舡而倍道方推策以赴
官竊承倅事之僚亦遲交符之禮敢期謙損先諭誨辭
矧恩榜之舊榮復朋方之雅契遽茲胥遇誠絕常均幸
促使裝早光郡閣披承孔邇庇賴居多威戢欣翹一二
非述

代鄭公回徐州啟

伏審顯膺恩制進拜東鄉伏惟欣慰恭以相公道燭民
鼻識經王體感風雲之會光輔兩朝勵金石之心惇崇
九德協時中而易退藹醲假以無言下武繼明惟藩注
意隱長城而為重增定鼎於既安昨以誌祀落成祈年
肆宥首圖舊德備厚徽章茂遷喉舌之司申獎股肱之
寄蕭規故在矧三府以奉行軒輔還歸於六符之增煥
恭聞師錫載穆民瞻且以某忝佐國鈞叙升天轄猥煩
台念先損書辭弗忘道悅之懷并露恩勤之意永言愧

荷叢篆丹愚

梅侍讀問候啟

伏以畿輔麗康任先作屏路門紬繹眷切均賢仰舊學
之敦脩謹寬條而靜布民謠叢美天貺臻和沛河海以
蒙霑慰纓綏之胥企清和協序殫納攸宜慨巾幘陪晤
之餘顧研削寓辭之訥第深靳嚮昌喻悰靈

柳侍讀啟

伏自侍讀暫違交戟三擁守符雖卧閣以臻和每側身

而懷想恭惟淮壩與府楚望劇煩多寄重於邇臣賴宣
風而樂職化漸襦袴已欽來慕之歌潤決河流更飫悌
懷之福竚伊朝夕入總機衡瞻頌所兼一二焉究

王侍讀啟

二日次左綿枉養人肅給餉醪筍皆濟所乏咸愧無
喻但去人滋遠思人滋深奈何陟頓雖勤幸無雨淖若
過二劍則無阻矣所過來半大稔民屋熙熙西南信樂
國也今日是學射出遊想千騎徜徉于鮮原把酒勞客

觀者牆堵并四者之樂不亦盛哉不得一接後乘歆艷
可知山阪日多乘百步馬從兵行役殊未有涯惟冀善
護玉體

賈都官啟

右某啟伏念初脫籍民塵濫中史局頃緣多難自分数
奇今屬長年未能藏疾乘天之幸所食遂浮誤市駿之
旁求結載繼之深愧逖懷茂彥素厚慈憐本推輓以及
茲戢題評而有在遽煩惠問遐記曩遊露直操以松寒

布深辭而雋永于囊是祕匪石能銘撫歲物以維祺睇
朋簪而甚遠願導冲嗇歸踐亨嘉企嚮緒風飛馳遐悃

回邠州夏館使啟

伏念逖違候表恍及歲陰惟使祭之雄邊隅私書之馳
舍永言瞻悰第結冲憂敢謂執事閑務中軍留情尺牘
因談賓之還調顧儒館以通音占吏敷辭彌驗雅歌之
適降階約禮居欽義府之敦申復至情昭銘中膈物華
腓晏戎索靖和善介蕃祺茂宣來譽

回知郡啟

不侍君子況以踰年間緣多病養成鴛鴦閑奉訊記叅
承寢興怡然西溯戀慙並結敢謂雅春申尋曩懷親占
書辭疾走郵舍啟緘長跪如聆面命非寄通遺迹疇及
于茲君侯遠守郡條靜勝天韵戢翰跼武久而未伸而
屏鯁後生充備臺省宜為校議之喧咋也惟寬中泰定
益保者範俾吾黨知所裁焉虔係虔係

回知郡主容啟

伏自執事嚮膺詔檢即領郡麾承便道以揚舲尋署文而坐府聞風守邸紆想搖旌俗慮所叢郵音未致敢謂曲敦謙槩追紀嘗僚時因計吏之西先損書牋之問辭情並縟固千里而不遠毫墨相鮮實一臺而均妙惕焉珍咏終以銘藏矧惟碩艾之姿久累淹回之嘆願綏介福行丐悖言德宇所瞻心微曷序

上知郡國博啟

伏承齋航便道使閣班條存煩記室之昔垂曉通閨之

舊備聆順福允集素襟知郡國博風局精強材謀明劬
歷更煩使休有令聲對薦交于露封眷求簡于中宸用
言劇部比遺薦瘥疇咨吏師撫我民瘵諒以暮年賦政
追西漢之惟良五袴騰謳與南風而同競顯躋治等歸
服近僚願保粹真下符傾嚮周年行晚清晤未期服義
素深操觚非叙

上九江知郡都官啟

服采中臺遡風南溟間薰衣之聯舍耿搖旆之離懷間

者敢謂都官曲記雅游嗣傳芳訊選言實至敦操彌堅
佩嘉惠之甚勤審冲禧之有裕矧二千石之重方倚吏
師什一頌之興載流民詠欽聆最狀益厚宸褒趨接未
期瞻疑何叙

與知郡啟

久偃民塵近還朝綴迷魂乍復常禮罕脩惟引籍之故
人方假麾於善郡瞻言友會實耿離悰頃留邸之傳音
承剖符而易地載揚善化以福編民諒謠頌之洽聞固

寵靈而胥委歲將窮紀人難離羣益慎生經少紓心嚮
錢大監啟

伏承執事懇露冲懷上還所事循道家之知止協禮典
之引年名聳士林眷回宸極聿奉綸函之命超升蓬觀
之華仍遂燕居永光達槩矧斯風之不競歷邇日以彌
偷囿物焚和醜顏冒寵功非叔子靡徇角巾之期才謝
伏波彊取據鞍之賞甘市朝之未利忘進退之大方果
籍者明追還古烈甫緣謝疾確爾布辭緬慕冶城之游

近襲鑑湖之躅固以流沾樂喜坐復於太和見勞神聰
益增於景算茲惟雅範足應昌辰初早荷殊私欽聞高
舉方期拜伏首枉音題感鑒所叢精微曷狀

上兩府謝改知制誥啟

伏奉去年三月壬辰詔書蒙恩授依前官知制誥者禁
掖清華王言密勿謬塵高選擢具常員志表叨榮煥餘
集懼伏念初稟生疇蒨植性狷疏因仕易農緣辰取宦
時維國教專預人材遂籍公仲之門入值史家之觀並

游羣峻竅擘芳蕤或抱絕容臺或紉書私室觀殊尤於
盛旦竄章句於諸儒官錄其勤上或稱善進籌九府之
局叅注二端之均泰與日偕忝隨事積旋屬弟親貳政
慈聖見憐謂進擬於異時必妨嫌而煩請弗由僉論直
寘禁聯成命自中聞者皆竦奈何屯蹇之運疴瘵夙纏
全劇無常倚徙多阻比請間而得見輒頓首以自陳願
守僻藩少紓羸疾俄蒙下蔡之組間換宛邱之章課不
時升法當有殿朝恩一解召節臨頒還合闔門之符重

瞻戶牖之坐危心歆艷悻魄晏安然早夜以惟材分知
止未即衰而老至不稱服而災生目糝眩花鬢垂紛葆
方將奉還邇職仍丐州麾收桑榆之末陰答天地之全
施不圖甄齒更逮芻微闕試可之成規即代言之親補
拜貺三陌循襟九回伏況書命之司風烈攸繫本之渾
灝濟以純深追周監之多文討漢興之爾雅布昭於外
潤色須工權輿毫端鼓舞天下詎宜顧晚可玷詳求上
隨郁穆之風自取稽留之悔寵靈云誤褒進有基斯益

閣下敦叙彝倫邁種昭德審無他惡惜委寸長啟佑清
衷財成慶澤使隕跼復蒂要駕還驅脫重險於風波曝
至情於日月謹當益探前載徐繹大猷服勤蚤入之常
慎對省中之語一簣而進稍免於有成萬折必東不平
於攸趣有如自昧可質明神卑情無任銘恩佩德激切
知歸之至

答李舍人謝知制誥啟

伏承寵牽制綽進直禁垣除日駛騰公言胥朴恭以舍

人思經民極迹踐聖藩對於亨期光我王國含章襲美
遂暢四支應用觀能不名一器故步書林以文顯持使
節以幹聞上簡帝心陰儲士望適以右閣虛坐雅誥須
才被召三槐之廷試草五芝之檢程文甫御定命俄頌
裒然丞髦式是辭省漆墀叨謝聿新柒炭之章宰案聯
暉尤重判花之體況代言之任歷選甚艱必潤色討論
鄭無諸侯之難以深厚爾雅漢同三代之風惟今值賢
訂古無愧必且言恭粉澤賁百度而光華筆隱風雷決

四方而鼓動敢圖譙緊謂接明襟推嘉會之所從墜餘
音而中眷豪英在選方欽名世之華翰墨相先更篤與
游之幸載循欣懌罔喻端倪

回余舍人謝知制誥啟

伏承進直禁垣已申面賀伏以紫微舍人器涵疏達學
貫本元由發策以逢辰久牽絲而從宦參儼芸秩入服
書林恥猛進以干榮每危言而蹈道自結明主數上公
車之章失意貴臣遂被長沙之謫關間歲月轉側風波

蒙沴雪以青青貫濁河而混混神明與正聰目咨賢果
副朝俞顯蹟諫列玉嘗剛而方貴朱被研而愈丹雙筆
外階列話言於左史一封出塞得要領於東方揭節未
還除書已降甫通辭於絳宸即嚴保於綸闈吾黨相欣
斯文有屬方且繹太常之典沂渾灝之源言代雷風竦
四方之鼓舞文含雲漢助萬物之光明展來自茲圖溟
巨測猥紆謙德肯貺長綫因感激於亨期引切偲之餘
論虛名冒忝向包糠粃之羞榮路趨陪今賴芝蘭之益

舞嗟銜戢訥鈍匪宣

上外任兩制謝改知制誥啟

比者叨恩宸扆授扶詞垣內揆孱疎舉叢榮愧竊念祁
器非周用仕偶丁辰著籍皂衣之聯待罪綠圖之祕稟
生多疾昧死請藩閭守兩州甫更三歲績幽宜黜上赦
弗誅亟蒙超節之頒歸服持荷之從未淹浹日俄掌命
書特免試言趣令就職長年廢學絕無潤色之工天分
思遲必抵稽留之禁茫然即寵惕若包羞此蓋執事早

欽定四庫全書

卷五十三

諒羈平顯為褒飭兼收短技弗使平除誤推轂於仕階
得演繹於瑣聞敢不深疏煩認研討舊常寢闕雲漢之
華參裨金石之度冀深尺寸仰謝題評感素多倪勅談
安叙

回彭王二舍人謝知制誥啟

向承茂擢已展慶儀恭以舍人陶粹天崖舍章聖城親
逢千載之運寢露七年之材熟復辰猷雍容公路黃鍾
大呂常默繚於鏗純拱璧天球不外矜於追琢居然難

進況也大成果膺給筆之求庸貴摘華之敏言泉注射
墨藁紛綸終篇晨達於上方成命暮頒於右省士林嗟
舞都紙貴騰粲身魚而飾金錫笥袍而染炭方且奉循
豹式敦繹綈封九變知言責羣條而玉振十行成札演
定命以風行甫頌得賢遽煩點翰因亨期之鋪述謂素
謁之推先然而平日撫塵幸同歡於方朔乃今視草固
所望於相如哉感自中拜辭之辱


回外任諸官賀改知制誥啟

嚮解郡符入朝天城蒙臺家之過聽俾綸省以司言制
授已行訴還無逮內循衰晚久廢討論思苦長卿之遲
謀罕裨謀之獲寵光浮量慙悸裝懷敢謂執事推轂交
情提衡仕輟樂聞成命馳述慶辭恣加丹雘之華陰示
併懷之庇冀藏嘉惠庸代良箴保直云初費詞難屬感
悰多緒萬一匪宣

上京東運使陳司勲啟

假守兩藩初不聞問朔風千里未克治書姑欽握節之

勞方倚轉芻之餉懦貪微畏財賦滋豐居然相門挺有
賢嗣敢圖謙下流眷孱羈屈四牡之雄嚴寓一函之勒
致服也無戮心焉願銘況聆朝譽之騰方竚皇僚之峻
茲為企禱固倍等倫



景文集卷五十三

欽定四庫全書

集部

景文集卷五十四至

詳校官侍講臣王燕緒

檢討臣何思鈞覆勘

總校官候補中允臣王燕緒

校對官學錄臣謝登雋

謄錄監生臣汪國均

欽定四庫全書

景文集卷五十四

宋 宋祁 撰

啟

上蔡州夏太尉啟

忝守近藩幸臨大府飛郵通問跼履蒙收閔方墜之禽
振其毛羽噓已枯之木奮乃條枚身匪無知恩歸有所
恭惟太尉天挺懿德邦咨大猷一其精心乂我不載竹

筠松鬣迴貫于霜秋蠅點夜脂不塵于玉色故能從容
自保間隙莫乘斯文賴安吾君倚相雖作屏侯旬而乃
情王家欽聆朝制之頒顯服乾台之冠竊商公議莫首
茂勲願御太和垂副輿望初方須交印尚阻造門翹溯
所天悃黯無喻

上夏太尉啟

伏自太尉肅持齋鉞出屏輿區總師節于中軍暢天聲
于西略諏辰前定樹政允和惟中外之瞻懷宜神明之

裊勞隱居一面界上國之金湯下自九天失殊隣之七
箸重威臨撫丕績竚光勳御粹沖上膺欽倚祈庇司計
幙阻蹟賓綦姑含螭陞之毫行計星巖之命此馬傾嚮
巨旣敷陳

上宣徽王太尉啟

伏審肅膺成命入鎮近藩伏惟慶慰恭以太尉忠貫穹
淵勲高河岱夙持齋鉞進筦天樞愴動四夷勤勞三事
盈虛更踐淄磷靡移向緣載斗之區申尋撓酒之約暫

煩臥鎮遠折陰謀二侯並橐一封講好亟騰冲懇求偃
善藩朝家重違制可遄報欽惟陳宛密倚畿寰幕府盛
開式重條侯之貴雅謠參發允旌南仲之功聊駐元戎
方還王室初幸叨守屏將獲交章榮慶所深筆舌無喻

上楊太尉啟

茲者太尉以本兵之重作輔有勞叅注安危式憲文武
膺一人圖舊之眷恭二節走朝之儀初無辦嚴不俟安
駕舞駉且信卓馬載革桓玉焜煌趣展當陽之覲彤闥

體貌載延晝日之咨中外傳聞紳綏瞻慶初嚮隣肅社
今覲還旂方依萬類之鈞猥奉八行之諭台光破節危
惓凝歡恨符節以坐拘望車茵而欣踴

上永興太尉啟

伏自太尉稱媛元戎肅開盛府便時有素樹政載和副
列辟之具瞻本明神之攸勞符階相比允繫夾輔之勤
臺節並橐蕪寄帡幪之賴諒乎順譖上協簡心恨沿牒
之前拘阻飾憐而趨侍永惟斷嚮莫喻名言

上晏太尉啟

比丐郡麾願嘗吏事章明公府身屬君軒雖曰見俞久
而被遣罔憚歎暑徑浮扁舟開秋之初署事為謹然壽
春故壤東楚劇藩務苦亂繩才由短綆益虞速謗敢議
課功以轉側畏塗違離恩館志緣慮怯感以事新鍛羽
自驚初無虛矢危涕方墮何待鳴琴尚賴仁人持衡至
公禦侮納之德宇非有他賜幸終大庇之私使無中道
之棄淮山千里城闕九畿官箴有常羈恨無訖臨風伏

紙言不能宣

上太尉相公啟

比者獲解郡章將趨朝次假塗近閭伏謁高牙肅瞻蕭
宰之規固應絕禮辱念馮唐之老輒俾右賓自授館以
云初逮出車之言邁嗣頒饗餼捆載芻禾務容醉吏之
汙茵亟接元侯之下飭迫于會計遽爾疾馳鬱搖旆以
自中戀疲軒而無極竊念和冥煩惟舊風績罕聞頃分
虎于善藩得臥龍之故里元戎出次因上冢而過家前

弩載驅獲望塵而候路永惟敝政罔振善經敢謂閣下
過聽謠言密仲薦寵以不足而取信蓋念至愚靡求備
以用人諒敦善勸孤生至陋云補無期屬閏序以日參
邈台光而天阻願遵順實下副民瞻竚聞零雨之來歸
復冠面槐之正位詎惟單跡獨庇大鈞

上太尉啟

近閱私憂甫寧病體久去外朝之著罕修執訊之儀跡
係民廬神馳義府恭惟太尉續宣金石忠貫天淵總離

衛以誰何訓善經而肅給百祥助順彌厚于福基三接
蕃恩永隆于邦翰孤平無以挺鑄攸依

上韓太尉啟

伏審光膺恩冊茂建將牙伏惟慶慰恭惟太尉道付粹
和神挺忠亮以才自奮逢聖有初發于謨謀式是文武
訓定西畧已偃靈臺之師參幹中樞遂成天下之務均
賢外閭乃心王家匈奴失箸以畏威疲屯緩帶而蒙賜
丕績升狀中宸簡襟誕告黑麻昭俾師鉞進視上衮移

總太原朝言僉同列辟歌艷然帝賚上哲民思大鈞秉
羽偃藩雖枳維之均重刻書進拜疑桑蔭之難淹今茲
治行實啟歸輔初曩聯冠佩今託帡幪側聆褒音倍百
常抃宿官惟謹趨府未諧

賀范太尉啟

伏審先膺詔旨臨貳帥符除目四頒公言三允太尉沈
謀先物積閱映時出車于西臥鼓無警亟緣褒典移蒞
朔陲屬壘雲聯仰九天之下將和營風靡企三日之先

庚顧惟儒掖之人謬假幕廷之節屈紆英躅垂佐中軍
欣素所叢訥言非叙

回夏太尉啟二首

嚮者築壇疏寵任屬舊臣跪輟啟行趣開盛府耿存心
于南闕副延首于西人審即令時已觀戎政太和憑厚
繁祉順膺太尉業映九功謀經三術亟躋台路再筦皇
樞又衆志以交修滿公言而無間比從藩榮回總計籌
慎致民財之豐彌簡帝心之眷果緣謀帥遂倚圖功分

虎殿邦剪鶉分壤出于左右由漢后之知人敦我詩書
識晉卿之制勝諒資成算益愴稜威共欽歌杖之辰前
啟坐槐之拜敢圖撫志遽錫芳音列感緒以鋪荼味吉
辭之實至永期銘鏤姑志恩憐瞻頌所叢文陳罕狀
屬者太尉輟務天臺懋恩將閭裂京營之近壤來建中
軍總關隴之上游別開盛府恭聆善旦參布寬條甫光
注賴之殊允契休嘉之集蠢茲裔種孤我朝恩雖上德
包荒議貸先零之罪而善經防患聊咨細柳之屯佇即

敘于戎疆永折首于廟算嘉庸所底休運來同初早荷
品題今遙趨伏敢期台造先枉教音均察父之慈憐重
孤生之感慨庶緣舊物終託洪鈞銜篆之叢名言罔託
回陳太尉謝啟

伏自太尉膺堯僉之舉服寵齋壇敦晉讓之風布誠需
奏垂聲音而敦勸鬱蕃錫之焜煌允協公言趣申成命
對揚陞幄祇受麾旄暴于見聞先我彛篆左右之為將
帥遂訂西京德義之本詩書用光中府猥煩題誨曲示

謙儀抃私悃以增深寓尺緘而何述

回李太尉啟

伏審顯奉宸恩就兼戎壘居幕府折衝之任用假鷹揚
領羽林宿衛之兵遙資肺附親賢參倚忠毅兼推渥命
霽行榮函首暨閱謙言之數悉慶使範之光華其在欽
銘併于誠悃

回壽州楊太尉啟

伏念淮月屢弦楚風增慄遐企齋壇之重方應制閭之

雄右武克和南公鵠誦猥煩輕驛垂貺芳函森有味之
詞條服彌光之德柄且承常履載集順祥雖琬節之繼
臻顧金城而為賴益加遵衛參副勒銘

回都知太尉啟

老辭法從遠守塞屯幸一候之無虞且九農之告稔是
容拙官未曠攸箴太尉軫舊興懷勞謙稟德弗責通書
之間遠詒執訊之音存獎蕙常銘藏何喻惟陟降于禁
闥方簡注于宸帷願保太和式符深禱

答并州韓太尉啟

伏自太尉建節洋道開府并門明翮上恩申慰善俗萬夫圍視以觀化列將抃股而畏威尋附慶辭未通便使而乃屈大國之重敦隣邦之和前損台銜茂申聘旨獎以情厚位緣眷隆伏況真將軍之尊自殊假帥舊令尹之懿方仰前規欽鏤歡言永為惠好

回河楊王殿丞啟

比過大邑枉迎餞勤勤不任愧荷新路甚佳但白水一

記畧不言足下分寸功已白田學士改撰碑刻兼景德

中曾修此路為浮論所奪

在興州圖經中

今足下能成之益見

至公之難也

賀監郡殿丞啟

浮祿計廷流光歲管敗材傷錦方百謫以自逃戴盆望
天固兩施之莫獲瞻言締友遂闕嗣音目以翹勤心焉
惆悵監郡殿丞厚將謙意綿布辭情越山阪之險塗講
松筠之堅操遠而相致但服于命儒藏以為榮更均于

占牘並游曷日良食惟時欽竚計還式符朝錫

回李太傅惠御製挽詞石刻啟

兩日前伏蒙尊慈以御製先中令挽詞石本垂惠者宸
章悼往思煥冥塗孝嗣欽光志垂終古輒忍哀而灑翰
方圖刻以傳家上昭子道之全次記天嫺之盛足揚茂
烈參紀無窮初忝預雅游猥闡珍刻悲叢昔感義服來
徽但期屋壁之藏均仰乾文之照日餘伸罄更埃披承

孫判官啟

伏念夏雲成簇嘗餞于歸轅冬雪飄花方窺于還尺咀
受辛之綿緲緩搖旆之勞勤始悟過家久留翹乘椎牛
上冢恣追道舊之歡掃葉飛柯徧識幽尋之地克涓秋
序乃冠賓儀嚮用福以惟寧專致柔而有謐靜言髦譽
素揭令名再從盛府之游頗屈清人之議天蘭挺美諒
無人而自香國馬斯材竚過都而歷塊慎齋為右傾否
何賒忝締朋簪敢忘心禱

到任上兩制啓

比膺中詔移守近藩蠲入謝以致虔許之官而從便即
因良月祇服郡條循揆上恩猥并歡素伏念初天鍾愚
直任忝華亨不衷取災无妄成疾移書賜告動輒旬時
請間願麾向蒙開可值淮肥幽殿望止罷歸敢圖藏疾
之憐遽徙陪京之屏疲軒載奮秋帶重跼胡為泥中蔑
有衛人之嘆已為闕內居無漢將之慙此蓋閣下恕以
推心形于引重先迷弗遠終惠乃長庶陰德之能銘匪
貌言之索序趨陪尚阻漸向增勤

回亳州韓郎中啟

託藩維梓最密台光恃舊遺簪時修書舍剽聞五袴之
詠參潤九河之餘景式焉依銘銜知所敢謂足下輟棠
廬之暇刻占囊凡之圖封申諉嘗僚顧存弊邑啟滕窮
紙內手循衿何三秋之帶方零煦同蕃藹而萬物之爐
故在待若祥金乃知至仁初無棄物姑慙鈍訥靡稱題
褒文組見縻側階胥遠馳神注想搦翰奚言

上兩地啟

今月初五日進奏院遞到官告敕牒各一道以崇文院書目成蒙恩加前件階勲者鴻都四部甫以書聞東觀諸儒竝從恩賜嘗預研摩之末亦霑宸綍之華內省循榮盈顏集愧竊念初晚參紬績最惡辱虛緣衆目之已成顧殘編而須具猥由未至僅纂餘功上則咨典領之英下則賴討論之熟彌年佔畢未知朱紫之分地日請麾遂棄鉛黃之習身嬰俗狀分隔文林敢圖秘錄之成首第陳篇之效眷言孤偃創辱甄揚崇躡文階優加勲

等為山而簣初無就效之勞弗稼而困卒冒因人之賞
斯蓋閣下輔裁丕化勵最彛倫謂一割之前施句寸長
而必取陰為獎地傳致恩章出守道遐讓還天遠姑勉
修于扞格冀云補于陶坯感緒叢臻窮言何喻

代回鄭太尉啟

茲者太尉懇辭禁衛請治侯藩亟升空土之華階改燾
茅苴之近社駢臻寵數式獎成勞猥貽讓爵之言彌見
崇謙之懿矧聆明命已布外廷冀少抑于冲謙即祇承

于渥典欽銘愧悚叢集于衷

回曹琮太尉啟

迺者太尉促勤封傳還控邊州尋承麾蓋之華坐制金
湯之重營平先計姑養漢威方叔壯猷寢光周詠日剽
公朝之論載欽賢帥之風敢謂英私遠貽誨翰露教條
而有斐挹謙柄以彌沖徒爾心藏闕然時答仰惟淵度
貸比苛文秉羽在辰燿烽徹警益符神勞增嚮福綏瞻
詠所叢敷題罔愬

回河東柳按察啟

伏自使軺東撫載耿騷離書舍右傳首煩辭誨布諄勤
于言味寫芬馥于情條隱几孰窺題襟增感惟晉邦之
地沃本漢斧之任雄銜軸轉輸舉調盈虛之節明緡下
諭允彰宣布之風益御太和上符丕眷盍簪未日搦管
奚云

謝許州賈侍中啟

避嫌計省留守圓田宿官如期中暑成疾方苦採薪之

劇遂稽進記之常敢謂太師侍中念封壤之鄰顧簪履之舊前遣使介臨賜教言饋品紛盈公門光寵撫危心而按堵殆感涕以霏衿伏況大丞相之位尊猥諸侯之地介降禮非便拜賜難勝尚緣老馬之仁通枉端平之問佩恩有紀論報何階

回宗兄員外啟

伏自去夏奄邁酷罰尋解官簿退伏民廛藐然孤苦濱于殞滅宗懿在遠號訴無從歲月不居中祥行及五情

摧怛奚所追逮敢期宗兄員外遠墮書幅傳逮苦廬隱
恤哀迷收齒疋痼銜佩愛勗交集涕洟餘生未死論報
知所書研久廢言叙不論聊奉手狀陳謝

上孫員外啟

伏念膠投夙夜契久荷于同心波委流芳存傷懷于顏
魄慨繫匏之多累約炊黍以無從員外茂質淑均瑰才
清飭早奉庭詩之訓頗興僚俊之嗟一昨恥官次之驚
棲奉鄉書之鶚薦多士褰裳而就列春闈揆藻以飛聲

雖投刃之有餘終引商而寡和兩峭輕進暫卹于壯圖
柱壁空歸未傷于全寶尤希消息別奉慶靈初喪紀已
終幹魂來復退思窮處道在裨而不揚進欲安求性為
倦而愈失夫何舛運遭此窮塗嗟我石交越在他壤莫
遑縷悉安緩蠢煩節物向榮道腴加嗇南望川陸不能
奮飛

回襄倅張著作啟

曩以奉外臺之傳檄因止漢南緣伯氏之交符得趨鈴

下自茲睽逝三易寒溫間收社櫟之材八玷橋門之館
百函之貢絕附于行人半面之情宜忘于車匠敢謂執
事乘政條之隙篤士類之情申戒齋防顧存閒冗兼金
吐訊踰荆部之丁寧墮月抽毫奮芝簫而霏灑內循叢
爾永刻恩斯矧訪曾筵昔緬雋軌函丈之諸生多在撞
鐘之舊矩焉依復此拜嘉并為深幸所嗟留滯尚阻趨
陪傾聞走節之朝用緩搖旌之思物華具秀春齊加調
回潞州郭觀察謝上啟

近者執事光膺宸綍移領州符飭追蓐以無留敝黃堂而坐治通書未暇爰簡載勤承布詔條之寬已孚風化之美然魏邦公子諒存闕以為心而漢氏侯封竚入朝而拱衛勉調沖用綏集太和引祝于茲遽談奚極

上徐州判府相公啟

嚮屬綿疴罔勤四體仰煩移告遂曠十旬中苦結轡之煩久愆奏記之問注情東夏延首貴台承福祿以萃臻撫翰垣而俾乂恭以相公材經而國功裕于天祇六德

以益嚴滿九言而無過游茲出處均我賢勞姬公來歸
頗鬱東山之思留侯為壽時想赤松之游益冀暢和上
符同體永言舊物茲侯洪鈞

上賈相公啟三首

伏以春塗韶婉邊候綏寧嬰攀文組之華寤寐翹材之
峻恭惟閣下委遠時柄倡導藩維訟息而民堵安兵戢
而顏行整憺威殊俗報政上臺暫留北鑰之嚴行復乾
台之冠內惟一物永託洪鈞

伏以楚艾被神周楚告歛有司靜事君子順時惟翰垣
控制之雄方亭障伏寧之裕畧去煩細取適高明道薦
太和神介多祉隆本朝之幹棟亘華夏之金湯悵所攸
歲未諧入謁瞻風在上引領增勞

伏以天贊丕圖帝賚良弼會霜秋之協叙符神岳以生
賢恭惟閣下國棟隆材宗彛重器暫為勞于左輔方倡
治于諸侯蓬矢戒辰翠綏胥慶乾台將鉞已圖績于同
寅絙月仙椿共歸年于難老永扶王室垂庇羣倫祁方

屬乘障未遑趨屏永惟慶抃第竦瞻祈

回并州明龍圖謝改諫議啟

近審廷褒制紼陞序諫垣伏惟慶慰竊以諮訪甚勤獻
替攸重冠七臣而分任均三接以造言惟爵之隆值賢
而受恭以閣下猷為交濟名實兼華久典南屏之麾仍
重東臺之秩甫修函牘仰慶齋鈴辱行舍之前通紆記
室而流問宣風屬部且符竹馬之期名對西清即參槐
府之論衿膺可復感頌奚殫

謝送碑啟

伏蒙以顯功碑墨本二軸垂賜者天祐孝節聖錫寶題
惟先王之有終冠元勲而獨出必繇論譔揭示方來執
事仁明所根負荷為重悉資傑筆參鏤翠珉奎鈞上騰
自有恤功之念烝彝覆視固無可愧之辭初久庇末光
祇膺厚賜丹青在目韶濩鏗音冀資不朽之名益熾無
疆之祚感悚于是敷述奚云

上江南轉運郎中啟

久伏民塵近還閨籍多難幽憂之後學殖寢荒平時英俊之遊書牋殆廢載懷高誼實耿離悰轉運郎中望秀材林業偕賢運丞樹風于官次洽廣聽于聰謀久資郎署之賢外駕使輅之傳千艘銜尾大集于中邦二節追鋒行階于上笏崢嶸歲晏悒鬱人遐願履常休用紓遙款

上新轉運張郎中啟

伏承祗奉臺音仍持漕節涓辰視事即日騰書肅使範

以先馳謁民言而交慶執事系承世閱材映吏師踐揚
薰省之華更奉輒刀之熟職思而辨上所自知比膺朱
閣之求將從暢轂之任拒榮固讓還秩見俞遂眷三洲
之南洊刺百城之劇簿書鉤校聿嚴露檄之期食貨懋
遷還佐大農之藏茲為倚任足示褒藉初嘗接官聯今
叨郡寄其諸多病真爾不材幸繫庶按之餘容免平鑄
之峻歡言企詠參萃于衷

回鄭州王相公問候啟

謬塵禁籍丕倣常歲再瞻坐府之嚴稍僭奏記之禮永
惟溯戀徒戢精微恭以閣下道契臣鄰敬孚樞極暢經
謀于宰路申著蕭規激高讓于邦風游光周屏蹈中和
而弗踰晚戢穀以攸宜惟是褰封均于潤福介圭來覲
固無信次之勞巖石具瞻況有僉同之舊但虞息偃難
廢延登冬律沍寒歲芳凋節益儲茂嘏永對昌期進謁
未從臨風增企

景文集卷五十四

欽定四庫全書

景文集卷五十五

宋 宋祁 撰

啟

上端公啟

伏念祁凡近之姿蹇運有素體中論黠曾不半癡稷下
從談何嘗名學徒以遭時文教記訓師門追琢其章丹
青厥采誤興廉于舉目叨服事于官儀向屬閣下中執

齊威外臺握節更張治具森布懿綱以一介之孤生戴
二天之巨庇賦角弓而植嘉樹寶燕石以裹重緹用法
語而發蒙露薦章而保往雖有小紙必勅其報書弗遣
長刀揖之而就席乃至官刑百謫民政一埤人有多言
課裁自脫免攸司之効舉俾終歲以罷還任非異人我
叨其賜初以濫恩慈展叨秩京司游奉上臺之符入佐
冑筵之講已綸而縉大畏于罔功既負又乘自虞以致
寇斯益伏遇閣下顯持邦論欣育士材品以月更言無

人廢謂飾之犧象莊生之材可收謂試之螳封督郵之馬差勝遵茲德賞溢彼智涯不然者遽蔡威施記入官師之用猪苓馬勃奚參藥籠之珍由技飾之驟加俾懦孱而與進敢忘日省上誤爾知有肺附以內銘豈喙長之殫叙

上大名相公啟

伏自險釁所鍾痼瘵亡幾竄身忼日續喘窮年託民屋以尸居顧仕塗而雨絕坏陶舊賜有墜無酬土苴餘生

從憂得損罔敢修于奏記非自棄于所天蓋乃秉國地
尊負薪病力距躍思勉既匪所宜窮咽萃中無容多訴
至于兩兩相邇曉然思乎泰階奄奄苟存居爾同于襁
物去冬十一月郢州從事谷昌言取道療邑傳誨諭辭
不圖荒窘之餘尚齒慈憐之末秋陽委燭部屋賴其容
光生符下招埋骹幾乎復固無言叙感有死如歸且承
太尉相公移總師垣并提武節暢威有北全重本朝屹
柱石于兩楹隱金湯于萬里鄧侯輔漢以上宰而分麾

台伯佐周抗二公而居外卧收民頌簡在帝衷而初式
苦廢殘阻聞風采窮生如繫徂景易邁溯東閣之故賓
長懷請見倚博陽之陰德脫冀重蘇獲報萬分迺為宿
計過茲而往未識所期卑情無任望風銜賜感服哀迷
之至

壽州到任謝兩地啟

案啟內年月與本
集謝上任表相符

奉去年六月十一日敕差知壽州已于今月七日禮上
訖東楚地雄左符任劇祗膺簡授舉萃震惶伏念初天

與朴愚仕緣熙泰嚮由冗劇超備從官嘗用親嫌不任
煩使日章大官之膳坐代上農之耕間不遑居懇求自
試事關三府恩許一麾值劇部之將更果細書而被選
淮肥之奧國府逋經夫井浩繁稻魚豐賤承邦條之寬
大洽方俗之樂和雖曰不能斬新與政斯蓋門下邁茲
九德模我彛倫在善埴以埏和俾薄材而進齒捫心揆
寵念德知歸署吏牘以云初扣車茵而未日參并感結
拙喻端倪

定州謝到任上兩府啟

昨奉詔書就移前件官者仰對明綰俯循華組地由邊
重帥以儒榮任不值能顏無容愧竊念初短謀腐學病
質衰年自宜力于藝文不應彊以軍旅比者承乏真定
臨制中權率職半朞無治言狀方襍被以須去俄假節
而益遷進領博陵深控幽朔營屯雲集亭障蟬聯列屬
九州有宜得便于事衷衆十萬無日不討于師號為劇
藩當待賢牧寧咨鯁儒再忝僉俞伏以閣下明總庶官

輔興邦綽廣十取五之路收百有一之長謂愚可矜雖拙有用遂俾文吏超攝元戎所賴敵運百年天聲萬里戍餘卧鼓之息城無早闔之虞操筌可制豪傑之驕持簿可期租賦之入倚國為重積日賞勤不然巢林一枝素省身而斂分假令入竹萬箇甘贖罪于曠官埏冶不私幘幪知所

定州到任回諸官啟

解符真定易地中山未成五月之勞復忝萬夫之長適

詢副貳並屈俊雄得聯紙尾之銜參重幕庭之選息藩
為幸庇短云初何枉勤私先貽慶問叢麻可倚誠有助
于飛蓬揚粃在前恐貽羞于嘉穀內名賡惠實託餘光
就部方勤盡言安叙

賀孔諫議上任啟

伏承諫議改佩使符近臨鄉社咨諏今日宣布寬條惟
盛德之世祠冠大東之誦訓干將沃若式觀上冢之容
粉米襜如更重趨庭之訓猥迂緘翰申費公儀矧禮義

之舊邦加中和之美化諒無遲報久沃詳求感戰傾勤
併萃中府

定州到任啟

今者祇奉詔期已如官次薦煩假節益壯護邊內循空
虛日用慙震伏以中山之劇朔北稱雄縻帑萬楹鎡械
億計暢轂蔽野高墉彗雲屯壁駢集以相望諸將奔走
而聽命宜待才選庸緝事經而初衰老之餘懦怯有素
傷羽不擇林以息窮鱗僅得水而安何意朝僉過仍師

節賴名臣之前治輯郡務而有條坐遵成規便足為政
短髮雖白幸弗事于論兵髀肉自完況無需于汗馬永
言榮遇特出誤知冀一割之可求詭萬分而為報宿箴
仍率瞻屏為勞

上兩地謝赴闕啟

今月七日奉被敕書候替人到交割訖發來赴闕者彌
年假守有詔代還許訖交章趣令上道榮生望表抃激
情端伏念初向以塵枵忝班禁近病多告數量極謗興

恩被典州責深共治雖勉迂儒之學曷揚循吏之風幽
績屢聞殿科輒寢內遷右輔間默煩言適以元帥勒歸
邇藩須屏因蒙召節再服君軒得上銅魚之符入趨金
馬之籍肉我枯槁植其危根大鈞所陶沒齒奚報然念
支離云舊奔走相仍兩目眩昏半頭蒼白收從江海遂
安北闕之心行及桑榆敢重東隅之悔翼趨有日舌訥
難宣

回季團練啟二首

向忝從官弗經煩使請閒求見頓首自陳願遂州符習
知吏課面蒙可制副在宰司謹成數月之留乃有一麾
之授逮茲班詔始復知榮地跨蟪淮之饒鎮兼屏節之
重茗醑參會魚稻豐饒蒙幸于天酬恩曷日敢謂足下
夔忘疎遠彌篤顧存勅記室以占辭付行郵而流問神
麻在握頓紓遠客之懷秋蒔辭條滋結故叢之戀庀官
云始修謁末期善嗇泰和式符遐禱

冒榮踰分因病早衰比不自遑願諧外補一麾蒙可三

府見矜獲引壽春之章遽結承明之橐淮山勝秀秬稱
影饒坐閤省躬實天藏疾然念間關去國晚晚驚年危
暝淙淙屢傷懷于遠道羈飛跼跼方破膽于虛弓充職
云初趨風未日永言悵戀拙布謝詞

回朱給事啟

比者給事入修覲禮奉望帝暉魁壘為儀重漢庭之皓
首任圖注意眷商國之舊人亟奉綠綈再濟青瑣會細
書之共治掩靈渚以疏封自霜簫之丁辰抗風旌而首

路恭承便日已振寬條遽沐飛文曲敦永好伏祝青松
貫歲援君誓以未忘零雨在天詠我來而均企方期櫛
朽薦託雲陰何煩記室之善辭但服歸藏之謙德願遵
保理益輔耆明蓬曲猥悚筆精罔叙

回知南京俞給事啟

嚮者多病乞麾蒙恩假守危心積悸劇務間嬰遯瞻萬
戶之康都曠致一函之私禮心焉慕嚮日以翹涓不謂
給事垂眷下邦遠形芳牘至言抉瞶嘉惠嘘枯聿沾齊

釀之甘申遣齋刀之熟重為褒貶交積肝膈如聞京室
之傳將被節臺之召斯人蒙福諒均愛樹之歌哲老還
朝遂重歌雲之寶王塗云穆士議載孚望安百順之宜
欽副四隣之待銘銜企願滅裂罔宣

致政侍郎啟

爾日動用佳宜某去門下已三年戍邊未得歸鬢毛禿
落衰疾相仍賴朝廷威令嚴具得以刀筆繩吏下為供
職然日夕內慙孤太上方面之選末奈何才短責煩得

無為老成嗚噓耶比驅使回墜教并賜沂公集副拜賜
欣感前日吾文錄遺事丐天篆立鄉名今又裒文章為
一家言獻臣冠篇示千載不疑立德立名兩無讓云

回壽州張侍中者

樂侍中即張啟者自陳徙壽故
初自壽徙陳啟云易地以此

嚮緣易地得遂趨風略接台華遽勤行後守藩云始進
記未遑敢謂侍中敦好士之風厚交符之契占詞記室
流問行人屈衛霍之雄稜講楚陳之盟好外依獎眷中
激衰孱官有職思書非言盡永惟銜佩姑誌埏鎔

河陽夏侍中啟

向解州符入陪禁籥鍛羽重奮勢固未安重創始平理
當滋慎不時通于奏記恐仰累于所天久而省循乃敢
參訊伏自侍中避劇右洛改鎮盟津委遠功名鎮息流
競內保元吉自存介石之誠被有褊心弗礙虛舟之觸
卓焉高躅冠我羣倫但緣一德之隆終峙三能之冠願
崇賢老永對貞期

同趙職方啟

辱書旨論諄諄不鄙僕竊外屈已所長以教育英才為
言彼古君子葦然不敢當況其下耶祁迂儒也才不過
中人偶以文詞塵內外制竊舊語陳言奉行文書為宰
相假借幸不敗官上過聽以為可用故佩三印章治常
山中山出入三年無一毫異績可報天子齷齪校米鹽
責吏下而已閣下不諂以任所不能而更推之使為古
君子所難何哉閣下純懿之德盎焉充于中世烈孰儔
然有文不自高以尚書即佐二千石而無難色僕固知

閣下賢者也才教而育矣特未用耳賢而未用大抵當路者貪知人之明皆願言之朝况僕所部切懷交轍哉之邵之才不待閣下槩陳而僕景仰舊矣尚何教育之云閣下之道固將光明當時僕雖老尚能賦菁菁者哉以贊太平盛事餘不一二

與常州知郡大卿啟

嚮者大卿被十行之眷肅三翼之行少冒秋陽徑浮月沙離惊坐耿淒律遽殘比自半塗常願雙素慮封人之

未定報記室以無從恭惟視政以來介祥尤盛仁人舊
里太守新藩過家上冢之榮置酒揮金之樂鄉評參慕
仕路罕偕諒茲愷悌之孚益助明耆之嚮攸箴異守接
武賒期搦翰遡風乃心惟極

轉端明殿學士謝執政啟

案啟中八月敕詰乃
至和二年之八月也

被八月日敕詰加前件職尋具奏陳讓續准九月十七
日堂劄奉聖旨不許辭讓者無庸應黜有詔蒙褒冒服
邇班長違孤懇伏念初性與愚狷才止朽疎一玷從官

五踰閏月雖數見上而無補故不稱職而外遷寢治邊
州兼護屯壘視縵胡之伍既與等夷顧章甫之儒巨為
節制上承廟筭前伐敵謀用能衣朝服犒將校之勤操
券最責錢穀之會牽勉常務遷延二暮方虞考課之嬰
遽誤僉言之獎進聯華殿仍秩講帷使人挾齋賜物紛
侑還恩弗聽即寵自惟以遠戍見矜是竊師武臣之力
且論治無實何解士大夫之譏敢商為地之端固本和
鈞之賴此益昭文相公茂襄昭德垂庇庶工有所不能

念先容之既爾久而未名借賞典以當然遂令無似之人得引以長之佩願圖涓露歸答埏鎔

同王太博謝高陽關部署啟

伏承光奉制恩出護屯壘僉擇惟允欣頌兼常執事授器過人移忠許國肅提千騎之警參守四方之封恭惟河間最重戎閫副貳之劇武力是資果契公言訓定師則何冲懷之徇好眷他帥以移文切仰干城已孚于先甲自然鄰國可假于餘光感著歡愉併萃情府

回綦撥發啟

近蒙恩檢俾領藩麾曾不遑居已茲署事顧異撥煩之
敏實孤共治之求敢謂英私特詒公誨玩書筠之溢美
均永雋之餘滋方此頒條尚賒接武瞻懷感鏤一二靡
宣

回張資政謝授職啟

伏審祇奉茂恩寵兼秘職伏惟慶慰恭以資政材資挺
傑器蘊淹華茂對亨期踐揚膺仕入侍機要顧靖密而

咸熙出殿翰垣允明良而協詠終然遶簡膺此崇褒進
規地之華聯總夾河之近輔署行詔尾歡激心靈遽辱
芳音俯循彛矩玩數言之勤降欽約禮之優隆感抃兼
叢書辭拙喻

回張副樞讓啟

伏審光奉命書入參樞省伏惟慶慰恭惟樞密懿文經
遠茂德秉彛服在光華之辰居然王佐之器禁綸經摛
冠瑞羽以為儀聚錦直繩卓孤風而難進上心克厭公

論所宗實驗虛席之求進預前帷之秘此焉亮采副是
疇咨遽規尚讓之文猶鬱懋官之授美言盈牘始誌于
冲懷成命隨風難淹于盛禮願回介節即順徽章欽祝
于中厓略非叙

同昭文張相公啟

伏審顯奉制恩冠升宰府伏惟慶慰恭以閣下遠謀沉
正徽鑒凝深外經人彛入亮王采萬事之本爰建于中
庸九德之光遂陳于歌叙曷鉉以之增重天階為之告

平順時登庸屬我良弼誕頒允命式進上司啟乃謨明
方資于乂辟載其清靜幸賴于宗臣遽辱鈞函尚遵謙
執幸體眷求之重少矜沖退之風下慰民瞻允符公議

回陳書記啟

伏蒙尊慈以長牋盛集為貺者申誦以還欽畏交集恭
惟記室員外雅材挺楚秀範標華直取俊科載沿仕牒
紆幄中之畫綽有香名鼓天下之辭弗忘素蘊鋪茶積
日搜第盈編方比能于大夫使知裁于吾黨何言無狀

獲此偃藩南揖賓儀遽行文贊研尋縉采震眩昏眸感
額于前雖願嘗于昌歆投人以暗得無辱于夜光匪曰
知音要之為寶輒少留于私橐將徧詫于文林銘悚所
叢端倪拙喻

回文相公啟

文館屬吏材閣故賓停節罷州賜環蒙召得用塵構之
蔽再侍公袞之華改館授餐回車垂謁思緣舊物自忘
位貌之差耳聽名言始恨風流之淺迫守近郡遂去下

陳軫帳寵行都人駭視即從便日已署化條伏以小國
之事大邦聘贄係道刺史之見丞相韡韡走階寧有行
李之未通猥煩使者之前至書教收卹醪醴嗣頒屈公
府之要儀眷州將之孱品餘波所潤雖涸輟而迴蘇和
氣交培諒折楊而有和望風云切離次有誅企戀門闌
飛馳心極

同人獻賦編啟

伏蒙示及新賦一編祇閱以還歆羨偕極竊惟善賦之

作本出古詩之流參大夫之九能判史家之五種有唐
取士甲令垂文揭為試藝之程用角陳篇之妙昌辰沿
制作者寢工足下孺筮興宗雅才名世蔚竒姿于豹韞
文乃積中徙怒翼于鵬池風斯在下暫綴修方之式回
光與計之求尚講鳴謙過詢懣學列羣章于繡帙卜真
賞于熬波九變知言但服春華之贍千篇奏御行膺夜
石之觀虔祝王塗進光賢運今茲銜佩詎及文陳第其
盛製輒敢借留

回復州乾明長老啟

恭自長老和尚紹膺祖位宏闢寶坊接利衆生漫踰一
紀子孫深盛功德無邊方念未來之人或隳承嗣之託
增上我慢謗佛自私因甲令之惟行露悲心而見託永
惟大士集此勝緣宜得斯文之雄以就多礪之刻猥咨
鄙思俾叙宗風業已踐言今茲具草徒成謏詒之索殆
非抖擻之辭又遇凌君景陽學該聖門書入能品特灑
鸞鵲以潤金石製為楷書小樣一本并用寄呈但羞廢

畧之文必取天人之誚一慙所忍千翰匪宣

回夏州大王啟

伏以夕窮流火時籥凝商呂篇紀登穀之期幽土詠烹
葵之候伏惟大王懋功惟志基德有隅罄忠力于熙朝
訓威和于大夏聿臨涼序沛集蕃祺遐枉書文滋銘禮
意

回張紫微啟

自覩制恩已伸面賀竊以禁垣分乎兩掖最邇密清雅

誥及于三王慎咨出納肇為清著專處烝髦謹射父之
訓辭贊安于之名命允鍾聖簡尤見難才恭以舍人基
德溫恭博文精祿清白之方有裕黃中之美可餐冀屬
芝蓋時巡禮祠順祝抒頌章于帝所參御漢篇較材等
于乃神觀升周士旋貳藩侯之政久淹天吏之期最目
上還薦章交委亟汗青于冊府爰封阜于諫帷議縣官
牢直之盆聊煩奏及執左史書思之簡久次珥彤果由
宰府之試言入視上方之具草紋袍異錫台座聯輝珠

網藥階于以重凝嚴之地芝封締檢于以裁郁穆之辭
渙號惟行公言允愜創藁金馬佇宣爾雅之風揚聲紫
微更覩垂光之盛式欽亨躅辱枉圓封味言選以終謙
鏤心微而永好

回張簡州啟

伏念絳繡之吏言歸已馳報幅青天之道云遠游墜圓
封夫何漢聞之望郎尚記庾池之舊屬貫四時之操于
以示乎後凋聯十部之賢不足方其款密恭銜嘉惠永

刻煩悰惟畫隼之班春間夢魚之豐歲西人之子歌後
曲以相歡樂職之詩續遺聲而加麗妙儲真粹輔進耆
明竚中詔以疾馳綴下陳而偕賀永言翹繼修染奚宣
回徐紫微啟

自觀制恩即伸面賀竊以表帝居之左右最重掖垣含
天憲之重輕孰先書命乃至各居一戶上法辰躔分署
五花聯光台座惟長君之茂獻總羣辟以慎咨曾是寶
賢允茲衆錫恭惟舍人元精播粹至妙揚和恥觀非聖

之書獨探大訓樂遇重華之旦寢服近僚鏘鏘鳴王之
趨婉婉長離之集青編紬史久次道山之游皓髮為郎
不詭雲中之對澹然淵塞隱若揚休果紆繡宸之知趣
上黃扉之試奏篇甫御定命已頒躋龍鳳之靚深動虹
蜺之光采造庭近對遂視淮南之書推食延慈更重高
門之地方將發揮文誥磅礴大猷作世陽秋為天雲漢
其綸其綍贊百度之昭明迺玉迺金追三王之灝噩適
符詠嘆遽閱函題矧叨聯事之榮何損撝謙之德愧同

前批已出于簸揚竊仰茂松庶容于庇賴自餘祇佩周
鑒多言

回臺直李屯田啟

近叨細札尋抵劇藩本緣藏疾之恩遂有出麾之請沆
茲視事殊匪觀能倚惟聖之在寬異攸箴而脫諉敢圖
眷舊遠賜褒存曾是危心戢餘驚于摧櫓居然晚歲仰
純茂于寒松甫限麾符阻陪紳袂戀悵感緒參集于衷

回大名李相公啟

伏審光奉制恩榮分帥節伏惟慶慰恭以閣下地居賢
亮業挺謨明歷相三朝迭蕃四國直躬蹈道種德在民
具爾之瞻實同一哉之心允協比緣巨屏遴擇守臣果
屬吹塵之賢遂寵齋壇之拜使牙肅建幕府宏開包魏
壤之河山奠居都會掩天街之畢昴繫賴撫和諒此殿
邦何稽入輔和幸聆成命參奉贊書方抃私悰遽覩鈞
翰荷巖廊之舊庇銜義府之餘恩感愧所并文陳罔逮

回外任卽官啟

幸聯郎舍晚盍朋簪間緣客鯉之來厚枉書筠之問章
兼辭篤感與愧并欽惟陵邑之封慎擇星曹之俊歲成
玆報宸獎茲蕃願遵明晦之宜交集康寧之祉並游未
日結想何言

賀宋鼂長舍人啟

自親制恩即伸面賀竊以紫垣右掖上憲經星之圖內
史贊書實賦隨風之命慎咨髦譽亮采官成本國僑東
里之材聯天老上台之坐式鍾下武彌見右賢恭惟紫

欽定四庫全書

卷五十五

微舍人粹稟天均謀經王體森然戰庫默蘊于神鋒卓
爾濶材迴標于國棟亟階膺仕茂對真期覃乎揚子之
深沈濟以荀家之惇惠道山善志徧窺典籍之林即署
久潛厭視文書之草多士賴司南之悟薦紳歸祭酒之
尊允會講求果先圖任三槐開府聊命于試言九齒美
塗俄觀于進拜蹈紫宸而點翰奉綠底以數辭大號有
孚至公胥協諒以鋪芬與義粉澤遠猷賁天漢以昭回
體玉絳之慎出矧茲並命莫匪正人鄒台枚延交美得

賢之論虞渾商灝益敦稽古之規適聳歡悰遽窺華檢
佩一謙之多益非九變以窮言

代胥舍人謝啟

伏奉制命以本官知制誥者經星秘掖素號于凝嚴瑞
鷗神池驟階于機近被褒函之載郁紆賜紱以增華宿
昔自循震慚無措恭以國家裁成訓告稽合本元監渾
灝于三王討溫純于二漢猶綸之出愍慎于始基如天
之章昭回而臨下疇咨邦彥進宿官成是必積美彌中

高文近雅挺安于秉筆之操本周興蘊積之流為國丹青有古風烈始符僉論姑免冒居若某者生本地寒長而祐薄偶易農而顯仕因挾策以觀書能賦能銘未習大夫之事小言小道纔齒稗官之流濫賢相于里人預偕來于計轍過塵策射旅贊部章歸課上臺玷名仙室佐閱吏曹之實間圖綿野之儀日幾之繁墨綬茲忝賓興失實切免去邦旋蒙三赦之仁追引九門之籍存膺佐治遂俾出麾棄杖復林寒灰始煥逮終更而來上邈

歸報以無期忽被恩符參陪計局籠財權利但苦于沈
迷貳令辟名未施于鉤校俄且記言右史糾讞中都拭
玉金微之庭慎修交勸握蘭建禮之署再周序遷官謗
愈譁績幽自審方期襍被庸警敗材不謂天誘其衷人
乘所乏召詣坐槐之府趣程視草之工慕受詔而輒成
第矜拙速顧每篇而稱善絕企前修俟訖程觀當從報
罷遽荷睿明之眷擢升清切之司使驛下臨笥章垂錫
恭惟名器至重竹素具存贊內史之出方遂為定命潤

裨謀之謀野必叩大猷分押尚書之章至均政事之食
協華在運稽古任良重念拘攣韁鎖之餘轉側風波之
後壯謀奪于多病情學廢于長年旅翮易驚孤根難殖
責高才而或躋先下品以奚堪此蓋伏遇閣下洞燭人
彛彌綸天律亮師師之百度已惠庶工開穆穆之四門
彌收俊德曲暢陵阿之化務安薪爇之宜遂俾妄庸亦
膺簡拔敢不穆參流晷師式大常絢裘英之五純奮刀
鉛之一割玉芝裁檢謹敷天下之言絳藥翻階居慎省

中之對庶申尺寸仰副陶埏

景文集卷五十五